

COMHAIRLE BAILE DHROICHEAD ÁTHA

AN tACHT RIALTAIS ÁITIÚIL 2001

RIALACHÁIN AN ACHT RIALTAIS ÁITIÚIL 2001 (FODHLÍTHE) 2006

FODHLÍTHE CHOMHAIRLE BAILE DHROICHEAD ÁTHA (RIALÁIL AGUS RIALÚ ÓL DEOCHANNA MEISCIÚLA IN ÁITEANNA POIBLÍ) 2007

DE BHRÍ go bhfuil an tÚdarás den tuairim gurb é leas coiteann an phobail áitiúil é laistigh dá Limistéar Feidhmiúil gníomhaíochtaí agus/nó nithe a rialáil agus a rialú agus gur chóir núiseanna a rialú nó a chur faoi chois **AGUS DE BHRÍ** go bhfuil an tÚdarás den tuairim, sa bhreis air sin, gur inmhianaithe ól Deochanna Meisciúla a chosc in áiteanna poiblí laistigh den Limistéar Feidhmiúil agus gur chóir Fodhlí a dhéanamh chuige sin déanann an tÚdarás **ANOIS** i bhfeidhmiú na gcumhachtaí a bhronntar air ag Alt 199 den Acht Rialtais Áitiúil 2001 agus na gcumhachtaí reachtúla eile ar fad sa mhéid sin **AN FODHLÍ SEO A LEANAS LEIS SEO:-**

1. Tabharfar Fodhlíthe Chomhairle Baile Dhroichead Átha (Rialáil agus Rialú Ól Deochanna Meisciúla in Áiteanna Poiblí) 2007 ar an bhFodhlí seo.
2. Sa bhFodhlí seo, ach má éilíonn an comhthéacs a mhalairt, beidh ag na focail agus na frásaí seo a leanas na mínithe seo a leanas faoi seach:-
 - a) ciallaíonn “duine údaraithe” duine atá údaraithe i scríbhinn ag an Údarás de bhun an Acht Rialtais Áitiúil 2001.
 - b) ciallaíonn “an tÚdarás” Comhairle Baile Dhroichead Átha.
 - c) ciallaíonn “chosán”, “bealach siúil” agus “bóthar” na mínithe a shanntar dóibh faoi seach ag Acht na mBóithre 1993.
 - d) Ciallaíonn “Limistéar Feidhmiúil” an limistéar laistigh de theorainn Chomhairle Baile Dhroichead Átha.
 - e) Ciallaíonn “deoch meisciúil” biotáille, fíon, beoir, pórtar, leann dubh, leann úll, leann pioraí agus deochanna milse agus aon deoch mheisciúil coipthe, driogtha nó biotáilleach nach féidir, de réir aon dlí atá i bhfeidhm ag an am, a dhíol go dlíthiúil gan cheadúnas ó na Coimisinéirí Ioncaim nó aon deoch nó leacht eile ina bhfuil alcól.
 - f) áirítear ar “áiteanna poiblí”:-
 - i. aon chosán, bealach siúil nó bóthar sa limistéar feidhmiúil
 - ii. aon mhórbhealach
 - iii. aon reilig, séipéal, cill nó garthimpeallacht aon séipéil
 - iv. aon áitreabh, limistéar lasmuigh, páirc nó áit eile a mbíonn teacht ag an bpobal nó ar ceadmhach don phobal teacht a bheith acu air, cibé an de cheart, mar fhoghlóir, nó de bhun cuiridh, ceada nó eile, ráite nó intuigthe, nó cibé ar fíochacht nó eile

- v. aon sráid, lána, cé, cul-de-sac, cearnóg, pasáiste, caolsráid, droichead nó tollán mar aon le haon limistéir nó spásanna dá leithéid atá comhtheagmhálach le haon cheann de na háiteanna réamhluaite.
- vi. aon traein, soitheach nó feithicil a úsáidtear chun daoine a iompar cibé ar luach saothair nó nach ea
- vii. aon chuid den urthrá agus aon uiscí cósta laistigh nó cóngarach don Limistéar Feidhmiúil

Ach ní fholaíonn sé:-

- (a) teach nó áit chónaithe príobháideach nó gairdín nó garthimpeallacht tí nó áit chónaithe mar é ach a mhéid is a bhaineann sé le gníomhú an úinéara nó an tsealbhora nó duine atá laistigh de nó air de cheart nó le cead ráite nó intuigthe an úinéara nó an tsealbhora;
 - (b) aon áitreabh atá ceadúnaithe d'ól deochanna meisciúla le linn na n-uaireanta a údaráítear le haghaidh díol agus ól an chéanna de bhun na nAchtanna Ceadúnúcháin 1833 go 1988 mar a leasaíodh; nó
 - (c) aon bhoird nó cathaoireacha lasmuigh d'óstán, de bhialann nó de theach poiblí ar bhóthar poiblí agus atá ainmnithe ag an Aire (mar a shainmhínítear é ag an Acht um Forbairt agus Pleanála 2000 (ar a dtabharfar "Acht 2000" ina dhiaidh seo) mar áiteanna atá oiriúnach le ceadúnú faoi Alt 254 d'Acht 2000 agus ar dheonaigh an tÚdarás ceadúnas maidir leo atá i bhfeidhm ag an am agus faoi réir ghéilliúlacht le haon choinniollacha atá i gceadúnas mar é.
3. Ní ólfaidh duine deoch meisciúil nó deoch alcólach ná ní dhéanfaidh sé iarracht a leithéid a ól in áit poiblí laistigh den Limistéar Feidhmiúil agus ní bheidh ina sheilbh ag duine ar bith deoch meisciúil nó deoch alcólach in áit poiblí laistigh den Limistéar Feidhmiúil agus an intinn aige é a ól in áit poiblí laistigh den Limistéar Feidhmiúil nó é a sholáthar do dhuine ar bith eile le hól in áit poiblí laistigh den Limistéar Feidhmiúil.
 4. Féadfaidh aon duine údaraithe agus/nó comhalta den Gharda Síochána a iarraidh ar dhuine ar bith a ndearaíonn sé go bhfuil siad ag sárú nó gur sháraigh siad foráil den bhfodhlí seo an chóngaracht a fhágáil agus greadadh leis nó gan sárú dá leithéid a dhéanamh. Measfar gur sárú den Airteagal seo den bhFodhlí seo é diúltú géilleadh d'iarratas mar é.
 5. I gcás go bhfuil amhras ar dhuine údaraithe agus/nó comhalta den Gharda Síochána le húdar réasúnta go bhfuil deoch meisciúil i mbuidéal nó i gcoimeádán in áit poiblí sa Limistéar Feidhmiúil (cibé an bhfuil nó nach bhfuil sé i seilbh an duine) agus go bhfuil amhras air chomh maith le húdar réasúnta go bhfuil cion faoin bhFodhlí seo déanta nó á ndéanamh, ansin is ceadmhach don duine údaraithe agus/nó comhalta den Gharda Síochána aon bhuidéal nó coimeádán mar é a ghabháil agus a scrios mar aon lena bhfuil ann gan bharántas.
 6. Duine ar bith a sháraíonn aon fhoráil den bhfodhlí seo nó a choisceann, a dhéanann iarracht a chosc nó a mhisníonn nó a ghríosaíonn duine chun duine údaraithe agus/nó comhalta den Gharda Síochána a chosc nó iarracht a dhéanamh é a chosc ó chumhacht a bhronntar faoin bhFodhlí seo a fheidhmiú nó a mhisníonn nó a ghríosaíonn duine éigin eile gan géilleadh le hiarratas faoi Alt 4 den bhFodhlí seo, beidh an duine sin ciontach i gcion agus dlífear air ar a chiontú go hachomair fineáil nach mó ná €1900.


7. (a) Beag beann ar an leigheas a bhforálar dó in alt 6 de na bhFodhlíthe seo, féadfaidh an Chomhairle, de bhun Alt 206 den Acht Rialtais Áitiúil, 2001 fógra íocaíocht shocráithe a sheirbheáil (laistigh de chiall an Alt 206 réamhráite) ar dhuine ar bith a dhéanann cion de bhun shárú na bhFodhlíthe seo. Sonróidh fógra íocaíocht shocráithe mar é méid na híocaíochta socraithe agus an tréimhse a gcaithfear an fineáil a íoc laistigh di d'fhonn ionchúiseamh a sheachaint agus beidh sé san fhoirm ghinearálta den bhfógra a leagtar amach sa chéad sceideal le Rialacháin an Acht Rialtais Áitiúil, 2001 (Fodhlíthe) 2006 – I.R. Uimh. 362 de 2006 – (nó mar a fhorálar dó in aon rialacháin leasaithe) **ach faoi réir** aon athruithe orthu a dhéanfaidh an Chomhairle faoina rogha féin i gcás na bhFodhlíthe seo.) Beidh méid na híocaíochta socraithe a bhainfidh leis an bhfógra íocaíocht shocráithe ionann le €75.00.

(b) Má mheasann comhalta den Gharda Síochána go bhfuil cion á dhéanamh nó déanta ag duine faoi na fodhlíthe seo, féadfaidh an comhalta sin an duine sin a ghabháil gan bharántas.

8. Cúlghaireann na Fodhlíthe seo Fodhlíthe Chomhairle Baile Dhroichead Átha (Cosc ar Ól Deochanna Meisciúla ar Shráideanna agus in Áiteanna Poiblí) 2002.

Ceaptha agus glactha faoi shéala coiteann na Comhairle an 14ú lá seo de Bhealtaine 2007.

I láthair nuair a greamaíodh Séala Coiteann Chomhairle Baile Dhroichead Átha leis seo:


MÉARA


BAINISTEOIR


CLÉIREACH BAILE

